

南宮縣志卷十三

鹽山賈恩紱編輯

文獻志

職官篇

宦績列傳

晉成藻曾爲南宮令雄傑卓犖令譽赫然去之日百姓攀車
遮道不得行宵遁去後爲北燕主馮跋輔相及卒跋甚痛
之

隋宋景西河人開皇中爲南宮令秩輔國將軍內散復州別
駕治長史宜昌竟陵二郡守隋碑稱其允文允武所在稱
奇製錦一同絃歌千室志懷清慎恆若履冰能官之美古

南宮縣志 卷十三
今獨絕又齊相大梁人爲南宮丞張服博陵人爲南宮尉
張榑河間人爲南宮尉隋開皇間與宋景同仕碑稱俱以
明哲來贊專城清勤自處譽宣鄰邑此据錄邢志邢於傳
末又爲之贊云

宋劉摯東光人嘉祐中擢甲科爲南宮令比縣俗敝賦重輸
絹疋折稅錢五百縣兩折錢三十民多破產摯請裁以中
價轉運怒將劾之摯曰獨一州六邑罹此苦甚非法意朝
廷不知耳遂疏於朝三司使包拯奏從其議自是絹錢二
百縣二十六民歡呼泣下曰長官活我去之日民爲立祠
摯與信都令李冲清河令黃萃俱以治績稱時號河朔三
令累官右僕射兼侍郎卒諡忠肅

元閭閻高昌人至正初爲達魯花赤字弱擊強政體明肅陞
任去民甚懷之爲立去思碑後爲陝西鹽運使

劉時美洛水人至正間爲南宮令發奸勦寇稱爲神君盜賊
相戒不入境

明楊繩洪武初知縣事兵燹之餘榛莽彌望繩課民墾治荒
地二三年後變爲膏壤畝收數斛時北平守巡官行縣履
畝徵稅檄守令以田賦之多寡爲殿最公諭民曰墾田雖
多慎無具報北鄙爲朝廷重地奈何盡民之力累爾子孫
吾以此得罪無憾矣故今南宮之稅視他縣稍輕其城邑
創造皆出規畫後詔旌表去後百姓思之祀名宦祠

方杲浙江錢塘人永樂中知縣事一統志稱其存心愷悌蒞

政公勤尋以政績著聞陞刑部郎中

隆英利津人宣德中由舉人知縣事敦樸節約有古循吏風
春夏常巡省郊野見禾稼茂盛者召農人慰勞之其惰農
則薄罰以示懲止樹蔭下進士女教以孝悌勤儉或供雞
黍則食之加以醢醴則不食時有神武衛二指揮持牒至
縣占地下屯英絕不爲禮毅然爭曰吾縣無隙地惟吾廳
事前地乃隙耳此外皆吾民常業不敢聞命二使知其廉
介不可奪乃舍之去故南宮屯地視他縣獨少擢監察御
史去祀名宦祠

高安字志康安陽人宣德八年由選貢知縣事有惠政鄰邑
飛蝗獨不入境民歌之曰侯在南宮民和政通蝗不入境

今之魯恭朱竹垞明詩綜采焉後陞杭州守至浙江參藩
范九德昌邑人正德元年由舉人知縣事爲政慈惠

方中淳安人成化中自玉山改任操守端謹蒞政詳明吏民
悅服汲汲以興學校爲務商文毅公稱之擢御史累陞副
使

劉鑑字也玉羅山人河南鄉試第一成化中自鄒平改知縣
事賦性剛果敷政公平時畿內大水清濁二漳交溢邑舊
有堤有司不成公私廨舍悉湮鑑相地勢建新城於飛鳳
岡民願占居者爲之酌其遠近喧寂長短廣狹俾出價各
有差取材於山鳩工於市瓦石丹堊米鹽蔴枲以類而聚
廟學壇壝公署倉庾闡闡城池舉之無遺而民不知勞遷

六安州守邑人立祠祀之

嚴紹祖歸德人宏治中由舉人知縣事爲政嚴明法行事舉孫承祖平定人監生正德中自汶上丞陞任州志稱其蒞政嚴明修城隍以禦流賊至今永賴

李宗文厯城人正德中知縣事雅好文事仁厚愛民誠格神明禱雨卽應

鞏思容東平州人嘉靖初由舉人知縣事爲政剛明善折疑獄有鄉民懷金夜歸恐爲人劫埋道旁塚中歸語其妻明日發之不得遂訴於縣思容曰汝歸何見其人曰只語其妻餘無見也思容笑且罵曰癡夫而妻爲私而不知乎繫其妻至一訊卽服又有盜二人御史數檄刑官考械不得

情復檄思容訊思容略訊卽置之令獄卒潛伺焉盜夜飲思歸一人曰幸令君舍我倘財爲他人所得奈何一人曰當時沈周秀才井中獨我與汝周家在臨清誰知者獄卒以聞令人至臨清果得賊復訊盜服罪稱神明其他類此甚多居邑數載人不能欺良善賴以怙恃奸民重足而立以卓異聞擢刑部主事

种雲龍咸甯人嘉靖初知縣事爲政廉靜南宮田舊不均或沃壤數頃糧不滿石瘠土之糧反重民甚病之時撫院檄郡邑釐革積弊雲龍毅然任之親履田畝選有行義耆民數人翼贊區理始無輕重之弊去後民思慕之祀名宦祠王揖齊河人嘉靖中知縣事天性廉介治政嚴明去之日囊

無長物一時輿論推其有古人風

胡廷召襄陽人嘉靖中知縣事賦性明爽雅尙寬平甯緩公家之費不忍奪民之有陞景州知州去之日百姓攀轅泣於道左不舍其行

沈大本山陰人嘉靖中知縣事慈惠善斷民懷其德士服其教

秋逢慶汝甯人嘉靖中由舉人知縣事嚴馭左右門禁肅然葉恆嵩字乾仲浙江太平人嘉靖中由舉人知縣事修南宮縣志通達政體後陞大理寺評事

王中孚揚州興化人嘉靖中由舉人知縣事公明爲政邑人稱平揖讓崇文諸生誦義陞東昌府判

胡嘉謨陝西涇陽人嘉靖中知縣事尋以憂去隆慶三年復任識度宏朗公信帥下一意撫安良善豪黠輩靡不斂迹乃若參定丁傭風勵學徒畫議築城銳然作始後先僅五月所條陳二十餘事眾享其利秋八月擢吏部考功司主事有去思碑

許光大河南安陽人嘉靖中由進士知縣事賦性清介時引神明自誓每遣家童旋里必鼓橐於眾以示不私蓋終其任請謁不行

周良臣湖廣公安人隆慶中由進士知縣事沈毅有遠略邑故行商鹽商窘民殊甚輒力請罷之卽境內可鹽地募民煎曬薄稅以抵國課閭邑稱便至繕城保障尤裨大計召

爲吏科給事中

喬巖河南商邱人隆慶中由進士知縣事端確有執居常無私喜怒政尙敦大節目自舉會初議條鞭法劑量獨當民賴不擾均差平賦表節興學悉厭人心厯任三禩村落雞犬不驚云以上皆載邢志

邢侗臨邑人進士能書與董其昌齊名萬厯中知縣事公正廉潔先教化後文法在任五年野無不耕之田下無廢學之士盜息訟簡吏民愛之號曰邢父尋擢御史邑人建祠祀之

況上進字晉卿涪州人以進士令南宮本經術以飾吏治秉清白而輕重布之興地利修隄渠籌鹽法崇學校以治行

擢侍御史民感其德謀立去思祠父老曰侯慈父母也宜祀縣之東偏諸生曰侯恩師傳也宜祀澤宮之右相持不決年餘高平范應賓蒞任以侯足爲邑宰效法諭士民立祠於縣署東南三十武且爲之記所謂在位無赫赫名去後令人思者耶觀士民之情可以知公之治矣

上官捷科澠池人萬厯中由進士知縣事有才幹慈惠撫民不尙嚴苛每自敘云志殫鞠摩心奚辭苦催科非政撫字誠勞爲吏治之實錄云

黃綱光州人天啟中知縣事初蒞任值妖寇鴟張不事紛擾以鎮靜保民邑有解木之苦役公力爭折銀一切大徭役俱請罷不累地方至編審征賦悉從輕簡在任四年邑民

貧者以溫勞者以息尋陞武選去民欲建祠公不許乃鑄石於紫微山之東以壽美績於不朽崇禎末官陝西殉難康熙十二年紳衿士民愈久而愈思其德追請崇祀名宦高知彰海豐人崇禎中由進士知縣事廉惠敏幹歲大旱知彰步禱輒應積年疑獄片言折之革耗羨清驛蠹崇學校時有室則四壁心則皎日翛然清逸邑肥貌瘠之頌後調知正定縣歸濟南寇亂殉節死

林起元字斗建文登進士崇禎十年知南宮縣事大清兵入牆子嶺下畿南七十餘縣南宮縣城被禍頗慘起元夫婦並死之二子尙幼義僕王德舍其子而將護其二子以免於難康熙志竟遺此事查戊寅之難城中士女殉者甚眾

詳列女表起元之死非誣豈爲清代諱言之歟茲補傳于此異

日配享彭公不爲過也

彭士弘遼東錦州人崇禎十五年由舉人知縣事履任之始值兵燹饑饉之餘加意拊循與民休息拮据二載著有成績十七年闖寇作亂攻城被執抗節不屈遂被害今闔邑肖像尸祝百餘年猶如一日建祠額曰忠烈

清裴繡山西介休人順治二年以貢生選知縣事時鼎革伊始瘡痍未復公拊循綏輯與民休息明於聽斷哀矜之意時見於容律已廉介自奉如寒素立書院置學田設義塚葺縣治殲除土寇以勞瘁致疾卒於官士民號痛如喪考妣相與奉其主祀於前令喬閭二公祠中扁曰定陽三愛

蓋三公皆介休人云

沈秉公遼東瀋陽人順治四年由貢生知縣事仁慈樂易不尙威刑加意教養賦役寬平且戢遊兵馭悍帥力除遞馬解運二役親勦鉅鹿賊盜民賴安全九年陞磁州守去邑人立祠尸祝公禁之不可乃命立爲南亭書院使貧士教習其中地在文廟西以上均載胡志

胡景銓字遜齋湖廣孝感人康熙十年以乙科選知邑事下車問民疾苦振弛剔弊以精核爲政禮遇紳士請謁不行吏不敢欺而盜賊息民獲其庇適大比戶口詳慎寬減丁從齒無浮賦從田無冒閭井頌其平又於公餘稽舊冊修邑志南宮文獻足徵公之力也

劉偉字泰瞻山東濰縣人康熙二十七年以乙科歷教授晉知邑事裁徭役平鹽價罷行戶設處草豆養馬不累里社訟無積詞額稅緩期不責保長七閱月邑歌孔邇忽值逃例部議罷職邑民叩闕呼冤者數千人竟不得留去之日送者扶老攜幼哭聲百里不絕明年卒於里邑人立祠祀之謂之東劉公祠以別於西劉公云

閻堯熙字東陽山西夏縣人丙戌進士由藁城令調知邑事素以嚴明稱懲胥役禮紳士竟日坐堂訟者至輒先詰之浮誣者立見往往不待對質而責呵及之靡不心服其應對質者原人逮之不假公役是非不崇朝而立判焉未逾月而健訟之風息尤嚴盜禁有積惡白日劫婦於路田夫

獲解堂下勞田夫以酒而重扶賊田夫懼曰他日遇之必死矣笑曰勿懼爾無復遇之矣遂斃之自是境內清肅雞犬不驚任歲餘於雍正二年陞晉州牧去之日邑人士惶惶祖道如失所依卽水夫末役亦薦其誠擁轍盈千人送抵晉州不絕以上三人錄鄭宏慶續志

王霖浙江山陰人乾隆四年由舉人任邑事慈惠愛民每行杖必默記登籍於歲終核其總數比較錢糧不與焉修大成殿有碑記又修建公廨署內西偏有新槐四建小槐安軒三楹公餘賦詩見志有贈日者董際綸句云六年官滿歸休去始信先生不我欺其恬退如此

冀州志

衷炳修字純一福建崇安人乾隆十四年由進士知縣事甫

下車以學校爲急卽察院遺基建東陽書院勾稽得學田地頃餘又查出學院按院地十頃餘歸入書院以作經費至今士林賴之

殷瑤河南汲縣人嘉慶十一年以舉人署縣事慈仁愛民勤於聽斷勸諭百端民皆感悟訟獄衰息徵糧立滾單單列十家使自輸納胥吏不能爲奸而糧早完嚴查保甲冬初責成地方支更守夜城中街巷及大小村莊不分紳民按戶撥夫盜賊遠遁一邑晏然年餘去任攀轅送者數十里不絕

吳承寵安徽歙縣人嘉慶二十一年知縣事政尙慈惠平減徭役廩中額馬之外捐備車馬以應差使不以累里民歲